

Grad Novi Pazar
Skupština grada
Odbornička grupa SDA Sandžaka
Novi Pazar
03. novembar 2025. godine

P R E D S J E D N I K U
SKUPŠTINE GRADA NOVOG PAZARA

Na osnovu člana 44. stav 1. i člana 149. Statuta grada Novog Pazara („Službeni list grada Novog Pazara“, broj 6/19), člana 44. stav 1. i člana 138. stav 1. Poslovnika Skupštine grada Novog Pazara („Službeni list grada Novog Pazara“, broj 6/19) podnosimo **PRIJEDLOG ODLUKE O RAZRJEŠENJU DIREKTORA TURISTIČKE ORGANIZACIJE NOVI PAZAR**, sa prijedlogom da se, shodno članu 109. Poslovnika Skupštine grada Novog Pazara, uvrsti u dnevni red i donese na sjednici Skupštine grada koja će se održati 04. novembra 2025. godine.

Odbornici SDA Sandžaka u Skupštini grada

Merfid Kamešničanin, predsjednik odborničke grupe,	Amela Spahić, odbornik
Dinheta Pulić, zamjenik predsjednika odborničke grupe,	Džanan Bačićanin, odbornik
Maida Baltić Spahović, odbornik,	Saima Brunčević, odbornik
Kenan Kadrić, odbornik,	Ilma Dupljak, odbornik
Adem Pepić, odbornik,	Anisa Fetahović, odbornik

PRIJEDLOG

Na osnovu člana 18. stav 1. Zakona o javnim službama („Službeni glasnik RS“, br. 42/91, 71/94, 79/2005 - dr. zakon, 81/2005 - ispr. dr. zakona, 83/2005 - ispr. dr. zakona i 83/2014 - dr. zakon), člana 32. stav 1. tačka 9. Zakona o lokalnoj samoupravi („Sl. glasnik RS“, br. 129/2007, 83/2014 - dr. zakon, 101/2016 - dr. zakon, 47/2018 i 111/2021 - dr. zakon), člana 3. Zakona o zaštiti prava i sloboda nacionalnih manjina ("Sl. list SRJ", br. 11/2002, "Sl. list SCG", br. 1/2003 - Ustavna povelja i "Sl. glasnik RS", br. 72/2009 - dr. zakon, 97/2013 - odluka US i 47/2018), člana 19. i člana 46. stav 1. tačka 20. Statuta grada Novog Pazara („Službeni list grada Novog Pazara“, br. 010-1/2019) i člana 137. Poslovnika Skupštine grada Novog Pazara („Službeni list grada Novog Pazara“, broj 112-274/2019), Skupština grada Novog Pazara, na sjednici održanoj 04. novembra 2025. godine, donosi

RJEŠENJE O RAZRJEŠENJU DIREKTORA TURISTIČKE ORGANIZACIJE NOVI PAZAR

I

Razrješava se dužnosti Dejan Belojica, direktor Turističke organizacije Novi Pazar, imenovan Rješenjem Skupštine Grada Novog Pazara 02-6/25 od 19. marta 2025. godine, prije isteka mandata.

II

Ovo Rješenje stupa na snagu danom donošenja a objaviće se u “Službenom listu grada Novog Pazara”.

SKUPŠTINA GRADA NOVOG PAZARA

Broj:
U Novom Pazaru, 04. novembar 2025. godine

PREDSJEDNIK

O B R A Z L O Ž E N J E

Pravni osnov za donošenje akta:

Pravni osnov sadržan je u članu 18. stav 1. Zakona o javnim službama („Službeni glasnik RS“, br. 42/91, 71/94, 79/2005 - dr. zakon, 81/2005 - ispr. dr. zakona, 83/2005 - ispr. dr. zakona i 83/2014 - dr. zakon), članu 32. stav 1. tačka 9. Zakona o lokalnoj samoupravi („Sl. glasnik RS“, br. 129/2007, 83/2014 - dr. zakon, 101/2016 - dr. zakon, 47/2018 i 111/2021 - dr. zakon), članu 3. Zakona o zaštiti prava i sloboda nacionalnih manjina ("Sl. list SRJ", br. 11/2002, "Sl. list SCG", br. 1/2003 - Ustavna povelja i "Sl. glasnik RS", br. 72/2009 - dr. zakon, 97/2013 - odluka US i 47/2018) članu 19. i članu 46. stav 1. tačka 20. Statuta grada Novog Pazara („Službeni list grada Novog Pazara“, br. 010-1/2019) i članu 137. Poslovnika Skupštine grada Novog Pazara („Službeni list grada Novog Pazara“, broj 112-274/2019).

Razlozi za donošenje akta:

Razlozi za razrješenje direktora Turističke organizacije Novi Pazar sadržani su u činjenici da je direktor Turističke organizacije u Novom Pazaru svojim objavama preko društvenih mreža i drugih kanala komunikacije promovisao ratnog zločinca Nebojšu Pavkovića. Nebojša Pavković je proglašen krivim i osuđen za udruženi zločinački poduhvat, zločine protiv čovječnosti odnosno ubistva, deportacije, prisilna premještanja, ubistva i progon albanskih civila i drugog nesrpskog stanovništva sa Kosova 1999. godine.

Skupština grada ima obavezu da sankcioniše postupke svih javnih funkcionera koji promovišu mržnju, netrpeljivost, veličaju ratne zločince i slave ubijanje i progon civila, žena i djece.

Zakon o lokalnoj samoupravi u članu 2. lokalnu samoupravu definiše kao pravo građana da neposredno i preko izabranih predstavnika upravljaju javnim poslovima od neposrednog, zajedničkog i opšteg interesa za lokalno stanovništvo.

Iz tog razloga je i predloženo razrješenje direktora Turističke organizacije, jer veličanje presuđenih ratnih zločinaca nikako ne spada u kategoriju javnih poslova od

neposrednog, zajedničkog i opšteg interesa za lokalno stanovništvo, a još manje se odnose na promociju turizma i kulturno – historijskog nasleđa Novog Pazara.

Prilikom izbora, Skupština grada nije ovlastila ovog direktora i nije mu dala mandat da promoviše lica koja su zbog odgovornosti za ubistva hiljade civila i progon više stotina hiljada civila osuđena na višedecenijske kazne zatvora.

Predloženim razrješenjem direktora Turističke organizacije, Skupština grada i odbornici koji je čine suštinski i formalno – pravno daju odgovor na pitanje da li direktor čije razrješenje tražimo ima podršku odbornika za veličanje Nebojše Pavkovića osuđenog ratnog zločinca.

Skupština grad je u obavezi da, kao osnivač, prati rad ustanova i njihovih rukovodioca i hitno reaguje ukoliko djeluju suprotno Ustavu i zakonima a naročito u slučajevima kada njihovo djelovanje može da proizvede negativne posledice po društvo, a posebno ukoliko se njihovim postupcima narušavaju dobri međunacionalni odnosi.

Razrješenje direktora je neophodno i zbog toga što je javnim svrstavanjem na stranu ratnog zločinca poslao jasnu poruku, ko je, kome pripada i ko njemu pripada i na koji način po njemu treba uređivati odnose u nacionalno mješovitim sredinama.

Postupak direktora turističke organizacije može se tumačiti i kao prijetnja te namjera da se trajno naruše dobri međunacionalni odnosi u Novom Pazaru i Sandžaku.

U danima kada se vrši iskopavanje i traženje potencijalne grobnice na Golom Brdu u blizini Novog Pazara gdje se sumnja da su zakopani civili albanske nacionalnosti za koje je osuđen isti taj Nebojša Pavković, direktor ustanove u atmosferi političke krize u državi, širi netrpeljivost i mržnju među drugim narodima.

Novi Pazar nije i nikada neće biti sigurna kuća za ratne zločince, Novom Pazaru nije potrebna mržnja, netrpeljivost a još manje su mu potrebni direktori koji se poistovećuju sa osuđenim ratnim zločincima i koji promovišu nasilje kao sredstvo za ostvarenje političkih ciljeva.

Usvajanjem ovog prijedloga Skupština grada Novog Pazara potvrđuje opredjeljenje ka antifašizmu, demokratiji, toleranciji, suživotu, i ravnopravnosti svih naroda i građana u Novom Pazaru.

Odbornički klub SDA Sandžaka u Skupštini grada Novog Pazara ovim prijedlogom zahtjeva od Skupštine grada Novog Pazara da hitno Dejana Belojicu razriješi dužnosti direktora Turističke organizacije Novi Pazar.

Objašnjenje pojedinačnih rješenja propisanih ovim aktom:

Izreka I: Izrekom I ovog rješenja Skupština grada razrješava dužnosti direktora Turističke organizacije.

Izreka II: Propisuje se da Rješenje stupa na snagu danom donošenja i utvrđuje se obaveza objavljivanja u „Službenom listu grada Novog Pazara“.

Finansijska sredstva za sprovođenje ovog akta nisu potrebna.